

石城縣志

光緒十四
年重修

石城縣志卷之三

江家桂分纂

建置志

城池

石城縣舊在高峯鋪東黃村元天厯元年縣尹黃昱遷今

治尙無城池明洪武二年縣丞倪望始築土垣週二百

五十二丈

參喻志

正統四年

舊志作宣德四年

爲廣西流賊攻陷

五年縣丞夏仲謙請易以磚石府通判馬文饒督其役

周圍五百三十五丈

府志作五百二十七丈誤

高二丈一尺厚半之

闢門三東曰望恩西曰鎮夷南曰威武北無門門上建

大樓四隅置角樓北近岡阜處東西各加鼓樓城上環

置窩鋪七南四東西北各一中軍窩鋪一在城北台嶺

中守以搖兵

案

國朝乾隆八年裁搖兵廢

蘇洲

內外罔不臣服故華夷一統凡有血氣者莫不尊親焉
雖遐陬僻壤窮邊極遠亦必防微杜漸設立衛所以守
鎮之所以然者不過撫育黎元期四方無虞俾之各安
其業咸遂其生也高涼郡屬邑石城曩歲被獯獠出沒
爲生民患有司屢以故上封事請立城池以守禦議調
雷州衛後千戶所全伍官軍以守其地惟時歲當庚申
肇基之日都司則委雷揮使鳳陽王公總督其事大藩
則委高涼郡通守馬公同任其勞二公勤謹朝夕不遑
甯處議遠邇略基址稱畚築量功命日以稽勤怠矧土
木之功浩繁且難譬猶爲山萬丈無一簣之虧掘井九
仞有及泉之效且周圍五百三十五丈越三載合設衙
門煥然一新落成之日厥功已就僉曰城池之設非細
務也宜立碑以貽後人庶知造城有自來矣徵予言以
記之予案高涼郡誌石城縣屬化州去治一百一十里
以邑名言之其地多石四面岡阜旋繞如城故名其邑
故址先在江頭鋪梁廢縣入羅州宋紹興間復置縣元
皇慶間遷縣於高峯鋪東黃村天厯間又遷於新和驛
東卽今縣治也洪武戊申土人羅福率眾歸附一屬化
州本縣仍舊焉古無城洪武二年縣丞倪望督工修築
土垣周圍二百五十二丈廢壞已久舊址尙存其所轄
四鄉路當衝要北通於廣西南達於交趾瓊廉重譯無
虛日逢迎有餘勞雖周圍四百餘里民稀而地廣也論
其形勢則雙澗曲折繞於外重岡盤旋擁其後層巒疊
嶂揖於左崎嶇峽山鎮其右此山川之凝結而縣治之

所以立也茲其城郭之完固三門之壯麗人物之往來
軍旅之保障金鼓之聲聞於石屋旌旗之影耀於望恩
形勢之壯觀且甲於他邦又非往日之比者然而百役
之勞雖一時厭煩其生民之樂業家室之相慶實保安
於悠久也歲當壬戌六月吉嘉靖閒添窩鋪一隆慶六
日謹勒於石以紀其首末云

年寇焚城圯知縣韋俊民修復增高三尺萬厯三十三
年又於原增處環爲陽橋復高女牆三尺梁子七百一
十有八添南北鼓樓各二張志崇禎十三年知縣陳濟增
修三門甕城時倉卒完工遇大風雨三門盡圯里甲苦
於修葺凡十餘載乃定陳濟亦因是落職 國朝順

治十三年增高一尺五寸易以平頭爲垛子六百零三
又建二大銃臺於東北隅西北隅康熙二十四年知縣
白玠以二銃臺不利風水詳准毀拆以其磚砌學宮照
牆並縣衙城上角樓鼓樓窩鋪等制今廢乾隆四十年

知縣喻寶忠重修城池人工浩繁因計城堞週圍若干丈畫爲十一分分派縣中十一都里甲取夫爲之其後繕修遂依舊例視某都中所捐築壞處各加葺治惟城大樓則均各鄉之力嘉慶二十年知縣張廷幹修補西北南三面崩缺處踰年旋圯參張志道光十四年知縣林星章會同教諭韓煥彝合紳士籌捐經費重修於十二月初十日興工十五年十二月十三日工竣延袤五百七十三丈九尺高厚如舊制城樓三座敵樓十二座窩鋪十四座一律完整復留盈餘銀壹千兩發當生息爲後修補之資三十年知縣陳開沅因盜警重修窩鋪增高女牆三城門敵樓各數尺添設礮臺十四座從此崇墉屹然苞桑永固矣

採訪邑訓導邱光鏞碑記邑之有城自洪武二年縣倅倪公望始

厥後易以磚石或拓基或增版作堵濬濠志不絕書迨道光甲午前邑宰古畚林公倡捐修築事竣復捐廉千兩分當生息爲善後計者至周且備歲己酉芷湘陳邑侯來官斯土勤政愛民適鄰封有盜警亟舉團練置器械以固疆圉仍慮雉堞之未盡善也集同寅商諸紳士議詳上憲卽取林公發當子銀鳩工庀材女牆六百有餘并三城門敵樓俱增高數尺修各窩舖添設礮臺十四座城門易堅厚之木爲之蒙以厚鐵三閱月而崇墉屹屹鞏固金湯寇聞風遠遜四境慶安堵焉從此有備無患戶盡絃歌陳侯之功不與林公後先輝映也哉是役也董其事者則前任海康學教諭全君志沂前雷州府學訓導江君熙和襄理者則城守軍功千戶周公裕寶而分勞監工則候補詹事府主簿江君瑞和貢生全元愷增生吳資秀監生張琦武生葉廷彰時參末議捐錢二百千以助工料者則余也是爲記

城濠深數尺廣一丈闕城以通縣中之水爲水關三東偏水由東門水關注濠東北之水由賓興前八硯池出古羅州至聚英坊會縣署右所前水分爲二一折而東由典史署右南趨龍家塘出南門水關注濠一折而西遠

都司署前南匯於薤菜塘又西北之水一自學前一自

西嶽廟俱導而南共會鄒家塘二塘并出西南水關注

濠惟北跨嶺無濠舊有土牆環之

濠塹浚鑿正統年無考

國

朝順治十五

府志作十三

年開深一丈五尺廣二丈五尺併

鑿後嶺時奉文增修平頭城總兵官栗養志移鎮本邑

詳請鑿池并鑿通後嶺血水湧出而止乾隆四十年知

縣喻寶忠允士民請始將北濠填塞

張志

光緒元年知縣

李健鵬合紳士修濬東門濠至南門濠止

櫟冊

案縣城北東西三面跨台山有半地脈自建嶺綿亘而

來北闕其門並闕其池亦因其形勢恐傷地脈耳順治

時鑿於前明正統閒爲西賊所破隆慶時爲倭奴所陷

崇禎戊寅又爲白梅賊所傷濬城隍鑿池北嶺相傳傷

殘地脈知縣王訓典史吳斌相繼而卒或亦形家所忌
矣後百餘年人文不興議者咸歸咎之乾隆乙未秋邑
侯喻寶忠蒞任士民卽以填塞此池請爰召工畚土填
之卽所傳修復龍頸是也今閱數十年車馬絡繹又復
蹂踐成坑培補而修復之是在官斯土者肩其任焉

張志

公署

養濟院附

萬壽宮在 文廟照牆之左

張志

知縣署舊在黃村元天厯中遷今治坐三台嶺正中明洪
武二年縣丞倪望復建正統五年縣丞夏仲謙成化間
知縣陳綱正德間知縣楊維甫嘉靖間知縣楊浩劉鰲
鄒伯貞萬厯間知縣謝璿

國朝乾隆初知縣王灝

厯次重修三十八年頭門譙樓毀於颶風四十一年土

民捐資建頭門卑小不稱體式門外兩旁店鋪逼塞中間路不盈丈舊時東有旌善亭西有申明亭基址俱被侵佔知縣喻寶忠逐一清查各鋪因遞年輸納地租日久遂漸越佔乃計各佔造鋪屋工料倍給其值令自拆改復減其地租還出所佔地寬四丈長六丈有餘四十二年知縣喻寶忠建堂東旁花廳重修川堂匾曰敬事堂及四堂東側之知稼堂匾曰聽松亭四十六年冬知縣喻寶忠修造屏牆頭門儀門內外甬道易舊規模今制上一進爲三堂舊東側有聽松亭久廢中一進爲敬簡堂卽川堂堂東旁爲東花廳堂西旁爲西花廳川堂之下中爲拱棚直接宅門門之左右各有門房宅門之外爲親民堂卽大堂堂東爲庫房前中爲露臺爲甬道東側爲號

房正東爲吏戶禮三房西側爲承發架閣二房正西爲

兵刑工三房前爲儀門東旁爲福德祠西爲監獄中爲

甬道又前爲頭門外爲屏牆牆之外爲橫街

參張志

教諭署舊在學宮內康熙三十八年改建頓宮東旁

府志乾隆

四十四年邑人士爲教諭陸文焉重修頭門三間左

爲學科右爲門房大堂三間二堂三間東西廊二間又

東偏書房二間外有屏牆直至節孝祠俱是學地

參張志

訓導署在明倫堂後舊大堂二進相連逼隘東隅爲荒地

乾隆三十四年邑人士爲訓導黃紹統捐修今大堂三

間堂下耳房二間二堂三間東偏書房上下六間後厨

房一間另後園一所明倫堂前爲甬道儀門三間左爲

學科右爲門房頭門一間外有屏牆

典史署舊在縣署內解東房康熙二十七年知縣韓鏐買武生黃衷屋作倉廩三十九年改爲典史署距縣治屏牆直街三十餘步乾隆四十四年典史岳秉中重修頭門三間儀門三間大堂三間二堂三間東西廊各一間三堂三間廚房一間

零綠巡檢司署原在城西南零綠地方後遷成四都石嶺墟距城西五十里

石城營都司署舊名所在縣口四十餘步後改建在聚英坊西南三十餘步乾隆四十四年都司孟明遠重修東西轅門二間左右鼓房二間頭門三間東偏字識房六間大堂三間堂下東西耳房二間西花廳一間二堂三間三堂三間東廊二間又西側箭道一所

案署原設守備乾隆初改都司

把總署在城隍巷北通十字街口距都司轅門西三十餘

步俱同上

養濟院在東關外萬厯二十年知縣謝璿建收養孤老每

名月給米三升冬夏給衣帛銀夏一錢二分冬一錢八

分張志同治十二年知縣奎成捐錢二百千光緒四年加

捐銀三百兩合交磐石當生息添設額外口糧檔冊

壇廟祀典儀注附

社稷壇在南門外較場西黃府志周圍牆垣壇以磚砌每歲

春秋仲月上戊日致祭祭品銀十八兩五錢八分三釐

在丁祭項內扣出作五祭匀支凡祭設主於壇硃漆書

曰縣社神縣稷神位前各帛一黑色鉶二簋簋各二籩四

豆四爵三共羊一豕一尊一祭日雞初鳴承祭官以下

各朝服齊集黎明贊引禮生二人引承祭官詣盥洗所

盥洗通贊禮生贊執事者各司其事

以下自迎神至望燎皆唱贊

贊

引禮生贊就位引承祭官至階前拜位立引班禮生二

人分引陪祭官文東武西各就拜位序立乃迎神贊引

贊升壇引承祭官升壇詣香案前司香跪奉香贊引贊

上香承祭官三上香贊復位引承祭官降復位贊跪叩

興

以下行禮皆有贊

承祭官行三跪九叩禮陪祭各官皆隨行

禮奠帛初獻爵司帛奉篚進跪奠篚司爵奉爵進獻爵

奠正中皆退司祝禮生至祝案前跪承祭官暨陪祭官

皆跪司祝讀祝畢詣祝位前跪安祝於案三叩興退承

祭官暨陪祭各官行三叩禮亞獻爵奠於左終獻爵奠

於右儀均如初獻迺徹饌送神承祭官行三跪九叩禮
陪祭各官皆隨行禮司祝奉祝司帛奉帛恭送瘞所承
祭官轉立拜位西旁東面候祝帛過復位引至望瘞位
望瘞贊引告禮成引退眾皆退

禮部則例阮通志張志檔冊

大清會典續纂
大清通禮 欽定

祝文

維某年月日某官某致祭於

社

稷之神曰惟 神奠安九土粒食萬邦分五色以表封圻

育三農而蕃稼穡恭承守土肅展明禋時屆仲秋敬修

祀典庶九九松柏鞏磐石於無疆翼翼黍苗佐神倉於

不匱尙饗

續纂
通禮

案會典社稷壇爲大祀

風雲雷雨山川壇在南門外較場東

黃府志

周圍墻垣壇以

磚砌每歲以春秋二仲上巳日合祭經費在社稷內經

費勻支壇中設雲雨風雷之位左設本境山川之位右

設本境城隍之位中帛四左帛二右帛一

白

尊一爵二

十有一陳設禮儀與社稷壇同

參會典續纂通禮禮部則例阮通志張志

祝文

維某年月日某官某致祭於

雲雨風雷

山川

城隍之神曰惟

神贊襄天澤福祐蒼黎佐靈化以流行

生成永賴乘氣機而鼓盪溫肅攸宜磅礴高深長保安

貞之吉憑依鞏固實資捍禦之功幸民俗之殷盈仰神明之庇護恭修歲祀正值良辰敬潔豆籩祇陳牲幣尙

饗

續纂
通禮

案會典神祇壇爲中祀

先農壇在東門城外建廟一座三間

舊志

每歲仲春亥日致

祭耤田四畝九分歲入穀十七石五斗

詳見
經政

屆期紅牌

金字填寫先農神牌於壇承祭官率所屬俱於前期致齋二日祭日各官朝服一切禮儀陳設供品悉照社稷壇之例經費在耤田穀價內動支祭壇畢各官俱換蟒袍不穿補服詣耤田行耕耤禮知縣秉耒佐貳執青箱播種耆老率農夫披蓑戴笠蒞於田間耕耤時農具用赤牛色黑箱色青耬種惟土所宜耆老一人牽牛農夫

二人扶犁農童六名唱歌知縣照九卿之例九推九返
畢釋鞭耒以次序立田首西北面上農夫終畝告畢事
各官補服望闕立通贊贊齊班引班分引知縣以下
至香案前按班序立行北面耆老農夫稍遠列行北面
隨立贊行三跪九叩首禮興各退

參會典續纂通禮阮通志賦役全書檔冊

採訪

祝文

維某年月日某官某致祭於

先農之神曰惟

神肇興稼穡粒我烝民頌思文之德克

配彼

天念率育之功陳常時夏茲當東作咸服先疇

洪惟

九五之尊歲舉三推之典恭膺守土敢忘勤勞謹奉彝章聿